

四庫全書

史部

欽定四庫全書

欽定續通志卷二十八

宋紀四

仁宗一

仁宗皇帝諱禎初名受益真宗第六子母李宸妃也章獻皇后無子養為己子性仁孝寬裕喜愠不形於色始封慶國公進壽春郡王兼中書令進封昇王天禧二年立為皇太子乾興元年二月戊午真宗崩遺詔太子即

皇帝位尊皇后為皇太后權處分軍國事遣使告哀于契丹己未大赦百官進秩一等庚申以丁謂為山陵使丙寅遣使以先帝遺物遺契丹進封涇王元儼為定王賜贊拜不名以丁謂為司徒尚書左僕射馮拯為司空樞密使尚書右僕射曹利用為尚書左僕射並兼侍中戊辰貶道州司馬寇準為雷州司戶參軍戶部侍郎李迪為衡州團練副使宣徽南院使曹瑋為左衛大將軍三月庚寅初御崇德殿太后設幄次於承明殿垂簾以見輔

臣夏四月壬子遣使以即位告于契丹五月乙亥慮囚降
死罪以下六月己酉命參知政事王曾按視山陵皇堂
丁巳契丹使來祭奠弔慰庚申入內內侍省押班雷允恭
伏誅丁謂罷為太子少保分司西京甲子改命馮拯為
山陵使丙寅降參知政事任中正為太子賓客秋七月
辛未馮拯加昭文館大學士以王曾為中書侍郎同中
書門下平章事集賢殿大學士呂夷簡魯宗道參知政
事乙亥遣使報謝于契丹丙子以樞密副使錢惟演為樞

密使辛卯貶丁謂為崖州司戶參軍八月壬寅遣使賀契丹主及其妻生日正旦乙巳皇太后同御承明殿垂簾決事冬十月壬寅契丹使來賀即位已酉葬真宗皇帝於永定陵以天書從葬

謹按通鑑輯覽

御批史臣以天書殉葬為是續綱目發明則以為非且謂當辨其偽焚其書誅其人夫天書妄誕本不足信事後止宜置之不論不議而已舉而投畀炎火且又追戮奸邪豈非彰真宗之過于殂落之後而究無補于政化之得失哉

辛酉降東西京囚罪蠲山陵役戶及靈駕所過民田租十一月丁卯朔錢惟演罷甲戌嘉勒斯賚塔克尊求內

附壬午以張知白為樞密副使十二月壬戌契丹使來賀明年正旦

天聖元年春正月丙寅朔改元庚午契丹使來賀長寧節
二月戊戌詔嘉勒斯賚歲一入貢丙子減西京囚罪辛
卯司天監上崇天厯行淮南十三山場貼射茶法夏五
月甲子行陝西河北入中芻糧見錢法辛未慮囚甲戌
命魯宗道按視滑州決河庚寅議皇太后儀衛制同乘
輿六月甲辰罷江寧府溧水縣采丹砂秋七月壬申除

戎瀘州虛估稅錢詔職田遇水旱蠲租如例辛巳蠲天
下逋負八月丙申降天下囚罪廢鄆州東平馬監以牧
地賦民九月丙寅馮拯罷以王欽若為門下侍郎同中
書門下平章事閏月甲午詔裁造院女工釋營婦配南
北作坊者戊戌寇準卒於雷州己亥馮拯卒丁未禁彭
州九隴縣采金冬十月辛酉徙陝西緣邊軍馬屯內地
十一月丁酉詔諸州配囚錄具獄與地里上刑部詳覆
禁兩浙江南荆湖福建廣南路巫覡挾邪術害人者戊

午置益州交子務是歲涇原畔迷卞杏家族內附

二年春二月庚午遣瘞汴口流屍夏四月辛酉詔三司

歲市紬絹非土產者罷之乙酉錄晉石氏後五月乙未

慮囚六月壬申罷天慶天祺天貺先天降聖節宮觀然

燈秋八月己卯如國子監謁孔子遂如武成王廟冬十

一月乙未朝饗玉清昭應景靈宮丙申饗太廟丁酉祠

天地於園丘大赦羣官上尊號曰聖文睿武仁明孝德

皇帝皇太后尊號曰應元崇德仁壽慈聖皇太后賜百

官諸軍加等乙巳立皇后郭氏

三年夏四月丁丑詔三館繕書藏太清樓五月庚寅慮
因癸巳如御莊觀刈麥賜織婦茶帛巳亥賜隱士林逋
粟帛六月癸酉環原州屬羌叛環慶都監趙士隆等死
之遣使者安撫陝西秋七月丙午詔邊戶為羌所擾者
蠲租復役二年八月戊午以忠州鹽井歲增課夔州奉
節巫山縣舊籍民為營田萬州戶有稅者歲糴其穀皆
為民害詔悉除之辛未蠲陝西旱災州軍租九月乙巳

詔司天監奏災異據占書以聞冬十月辛酉以晏殊為樞密副使十一月己卯罷貼射茶法辛卯以襄州水蠲民租振晉絳陝解州饑戊申王欽若卒十二月癸丑以王曾為門下侍郎張知白同中書門下平章事乙丑張旻為樞密使是歲環慶蕃部鬼通等內附

四年春正月庚子涇原兵破康奴族二月甲寅詔吏犯賊至流按察官失舉者併劾之庚午置西界和市場三月己亥鄜延蕃部首領曹守貴等內附夏四月壬子詔

京東西河北淮南平穀價五月壬午詔大辟疑者奏讞
有司毋輒舉駁戊子慮囚閏月戊申減江淮歲漕米除
舒州太湖等茶場逋錢辛亥復陝西永豐渠以通解鹽
六月辛卯以大水避正殿減常膳丁酉降天下囚罪蠲
畿內京東西淮南河北被水民田租秋七月辛未減兩
川歲輸錦綺易綾紗為絹以給邊費八月丁亥築泰州
捍海堰己丑詔施州溪峒首領三年一至京師九月錄
周世宗從孫柴元亨為三班奉職辛未廢襄唐州營田

務以田賦民冬十月甲戌朔日有食之壬辰詔郎中以
上致仕賜一子官

五年春正月壬寅朔帝率羣臣上皇太后壽於會慶殿
遂御天安殿受朝己未晏殊罷戊辰以夏竦為樞密副
使二月丙子振京東流民三月罷瓊州歲貢瑋龜皮
紫貝夏五月辛亥慮囚癸亥楚王元佐薨六月甲戌禱
雨於玉清昭應宮開寶寺丙子詔決畿內繫囚癸未罷
諸營造之不急者秋七月己亥振秦州水災賜被溺家

錢米丙辰塞滑州決河詔察京東被災縣吏不職者以
聞九月庚戌開龍衛神勇軍習戰冬十月辛未罷陝西
青苗錢己丑頒新定五服敕十一月丁酉以陝西旱蝗
減其租辛亥朝饗景靈宮壬子饗太廟癸丑祀天地於
圓丘大赦十二月丁亥詔百官宗室受賂冒為親屬奏
官者毋赦

六年春正月己酉罷兩川乾元節歲貢織佛二月壬午
張知白薨三月丙申朔日有食之壬子以張士遜同中

書門下平章事癸丑以姜遵為樞密副使己未以范雍
為樞密副使壬戌作西太一宮夏四月丁丑貸河北流
民復業者種食復是年租賦癸未命官減三司歲調上
供物降畿內囚死罪流以下釋之罷諸土木工振河北
流民過京師者五月乙未交趾寇邊六月丙寅罷戎瀘
諸州穀稅錢秋八月乙丑詔免河北水災州軍秋稅冬
十月甲申除福州民逋官莊錢

七年春正月癸卯曹利用罷二月庚申魯宗道卒丙辰

張士遜罷以呂夷簡同中書門下平章事集賢殿大學士丁卯以夏竦薛奎參知政事陳堯佐為樞密副使癸酉貶曹利用為崇信軍節度副使房州安置未至自殺癸巳募民入粟以振河北閏月戊申禁京城剏造寺觀壬子復制舉六科增高蹈邱園沉淪草澤茂才異等科置書判拔萃科及試武舉三月癸未詔百官轉對極言時政闕失在外者實封以聞夏四月庚寅赦天下免河北被水民租賦辛卯南平王李公蘊卒以其子德政為

交趾郡王五月癸酉慮囚六月丁未大雷雨玉清昭應
宮災甲寅王曾罷秋七月癸亥以玉清昭應宮災遣官
告諸陵詔天下不復繕修八月丁亥朔日有食之罷天
下職田官收其入均給之己丑以呂夷簡為昭文館大
學士辛卯夏竦復為樞密副使陳堯佐王曙並參知政
事冬十月壬寅開虎翼武騎卒習戰

八年春正月甲戌曹瑋卒三月詔河北被水州縣毋稅
牛夏五月甲寅賜信州龍虎山張乾曜號澄素先生辛

酉慮囚秋八月丙戌詔詳定鹽法九月乙丑姜遵卒已
己以趙稹為樞密副使冬十月丙申弛三京河中府賴
許汝鄭鄆濟衛晉絳號毫宿等二十八州軍鹽禁十一
月丙寅朝饗景靈宮丁卯饗太廟戊辰祀天地於圜丘
大赦

九年春正月辛未減畿內民租二月癸巳復職田夏五
月乙丑慮囚秋七月丙午契丹使來告其主隆緒殂子宗
真嗣立遣使祭奠弔慰及賀即位冬十一月丁亥弛兩

川礮禁是歲契丹使來致其先帝遺物及謝帛祭女真晏
端等百八十四人內附

明道元年春二月庚戌以張士遜同中書門下平章事
丁卯以真宗順容李氏為宸妃是日妃薨戌戌遣使錄
江淮繫囚已亥除婺秀州丁身錢夏四月丙午慮囚五
月癸酉遣使點檢河北城池罷甲密訪官吏能否壬午
廢杭秀二州鹽場秋七月丁酉王曙罷八月辛丑以晏
殊為樞密副使丙午晏殊參知政事甲寅以楊崇勳為

樞密副使壬戌大內火延八殿癸亥移御延福宮甲子
以呂夷簡為修內使乙丑詔羣臣直言闕失丁卯大赦
九月庚寅重作受命寶冬十一月甲戌以修大內成謝
天地於大安殿謁太廟大赦改元百官進秩有差是日
還宮壬辰延州言夏王趙德明卒癸巳以其子元昊為
定難軍節度使西平王十二月壬寅以楊崇勳為樞密
使

二年春正月己卯振江淮饑二月乙巳皇太后服袞衣

儀天冠饗太廟皇太妃亞獻皇后終獻是日上皇太后
尊號曰應元齊聖顯功崇德慈仁保壽皇太后丁未祀
先農於東郊躬耕藉田大赦羣臣上尊號曰睿聖文武
體天法道仁明孝德皇帝三月丁亥祈雨於會靈觀上
清宮景德開寶寺庚寅以皇太后不豫大赦甲午皇太
后崩遺詔尊皇太妃為皇太后夏四月壬寅追尊宸妃
李氏為皇太后至是帝始知為宸妃所生戊申聽政於
崇政殿西廂壬子詔臣僚宗戚命婦毋得以進獻祈恩

澤及緣親戚通表章罷創修寺觀自是帝始親政癸丑
召還宋綬范仲淹丙辰黜內侍江德明等己未呂夷簡
張耆夏竦陳堯佐范雍趙稹晏殊罷以張士遜為昭文
館大學士李迪同中書門下平章事集賢殿大學士王
隨參知政事李諮為樞密副使王德用僉書樞密院事
五月癸酉詔中外勿輒言皇太后垂簾日事戊寅慮囚
六月甲午朔日有食之壬寅錄周世宗及高季興李煜
孟昶劉繼元劉鋹後戊午減天下歲貢物秋七月丁丑

增知耀州富平縣事張龜年秩令再任以其治行風告
天下戊子詔以蝗旱去尊號睿聖文武字仍令中外直
言闕政八月甲午遼使來弔慰祭奠冬十月甲辰詔以
兩川歲貢綾錦羅綺紗以三之二易為紬絹供軍須癸
丑降東西京囚罪一等徒以下釋之戊午張士遜楊崇
勛罷以呂夷簡為門下侍郎同中書門下平章事昭文
館大學士王曙為樞密使王德明為樞密副使宋綬參
知政事蔡齊為樞密副使十一月癸亥薛奎罷增宗室奉

乙丑追冊美人張氏為皇后甲戌贈寇準為中書令十
二月甲辰以京東饑出內藏絹二十萬代其民歲輸乙
巳詔修周廟戊申出宮人二百乙卯廢皇后郭氏為淨
妃玉京沖妙仙師居長寧宮丙辰出御史中丞孔道輔
及諫官范仲淹仍詔臺諫自今毋相率請對丁巳詔改
明年元禁邊臣增置堡砦

景祐元年春正月甲子振京東饑甲戌詔執政大臣議
兵農可更制者以聞詔募民掘蝗種給粟米甲申淮南

饑出內藏絹二十萬代其民歲輸庚寅詔停淮南上供
一年二月乙未罷書判拔萃科辛丑詔禮部貢院諸科
舉人七舉者不限年並許特奏名甲辰權減江淮漕米
二百萬石戊申詔麟府州振蕃漢饑民三月壬午免諸
路災傷州軍今年夏稅癸未蠲解州畦戶逋鹽之半夏
五月辛酉出布十萬端易錢糴河北軍儲丁卯禁民間
織錦刺繡為服飾罷西川歲貢織錦壬午慮囚六月壬
辰交州民六百餘人內附庚子免畿內被災民稅之半

乙亥毀天下無賴寺院壬午罷造玳瑁龜筒器秋七月
己亥樞密使王曙加同平章事八月庚申薛奎卒癸亥
王曙卒庚子以王曾為樞密使辛未以星變大赦避正
殿減常膳壬辰詔淨妃郭氏出居於外美人尚氏入道
楊氏安置別宅冬十一月己丑立曹氏為皇后

二年春二月戊辰李迪罷以王曾為門下侍郎同中書
門下平章事集賢殿大學士王隨李諮知樞密院事蔡
齊盛度參知政事王德用韓億同知樞密院事三月戊

太廟奉慈廟乙未祀天地於圜丘大赦羣臣上尊號曰
景祐體天法道欽文總武聖神孝德皇帝十二月壬子
加嘉勒斯賚為保順軍留後

三年春正月壬辰追復郭氏為皇后丁酉葬皇后郭氏
二月丙辰命官較太常鍾律壬戌詔兩制禮官詳定京
師士民服用居室之制丁卯修陝西三白渠三月癸巳
復商賈以見錢算請官茶法夏五月庚辰購求館閣逸
書丙申慮囚丙戌天章閣待制范仲淹落職知饒州集

賢校理余靖館閣校勘尹洙歐陽修並落職補外戒百
官越職言事秋七月丁亥禁民間私寫編敕刑書辛丑
降三京死罪一等徒以下釋之八月己酉班民間冠服
居室車馬器用犯制之禁冬十二月丙寅李諮卒丁卯
以王德用知樞密院事章得象同知樞密院事

四年春正月壬午詔均諸州解額乙丑置赤帝像於宮
中祈嗣夏四月甲子呂夷簡王曾宋綬蔡齊罷以王隨
為門下侍郎同中書門下平章事昭文館大學士陳堯

佐同中書門下平章事集賢殿大學士盛度知樞密院
事韓億程琳石中立參知政事王駿同知樞密院事五
月庚戌皇子生降死罪一等流以下釋之是日皇子薨
乙卯以旱遣使決三京繫囚秋七月丁未詔河東河北
州郡密嚴邊備冬十一月癸亥罷登萊買金場

寶元元年春二月甲午安化蠻寇宜融州三月戊戌王
隨陳堯佐韓億石中立罷以張士遜為門下侍郎同中
書門下平章事昭文館大學士章得象同中書門下平

章事集賢殿大學士王鵬李若谷並參知政事王博文
陳執中同知樞密院事己亥發邵澧潭三州駐泊兵討
安化州蠻夏四月癸酉王博文卒乙亥以張觀同知樞
密院事壬辰除宜融州夏稅五月乙巳慮囚冬十月丙
寅詔戒百官朋黨十一月甲辰詔廣西鈐轄進兵討安
化蠻乙巳詔宜融州民嘗從軍役者免今年夏稅運糧者
免其半戊申朝饗景靈宮己酉饗太廟及奉慈廟庚戌
祀天地於圜丘大赦改元羣臣上尊號曰寶元體天法

道欽文總武聖神孝德皇帝乙卯王曾薨十二月丙寅
鄜延路言趙元昊反甲戌禁邊人與元昊互市己卯以
泰寧軍節度使知永興軍夏竦兼涇原秦鳳路安撫使
泰寧軍史作奉寧考宋無奉寧軍故據東都事畧改振武軍節度使知延州范雍
兼鄜延環慶路安撫使

二年春正月己酉王隨卒辛亥安化蠻平癸丑趙元昊
表請稱帝改元三月戊午賜陝西緣邊軍士緡錢夏四
月癸亥授嘉勒斯賚二子嘉沁莽嘉扎卜團練使乙丑

放宮女二百七十人壬申免昭州運糧死蠻寇者家租
徭有差丁亥募河東陝西民入粟實邊五月癸巳詔近
臣舉方畧材武之士各二人癸卯命近臣同三司議節
省浮費丙午遣使體量安撫陝西河東巳酉慮囚壬子
王德用罷以夏守贊知樞密院事六月壬戌詔省浮費
自乘輿服御及宮掖所須俱從簡約若吏兵祿賜毋槩
裁減壬午削趙元昊官爵除屬籍秋七月戊午以夏竦
知涇州兼涇原秦鳳路沿邊經畧安撫使涇原路馬步

軍都總管范雍兼鄜延環慶路沿邊經畧安撫使鄜延
路馬步軍都總管八月丁卯以軍策城嘉勒斯賚補本
族軍主甲戌皇子生丙子降三京囚罪一等徒以下釋
之九月乙卯出內庫銀易粟振益梓利夔路饑十月庚
午賜麟府州及川陝軍士緡錢甲申詔兩川饑民出劔
門關者勿禁十一月戊子出內庫珠易緡錢糴邊儲丁
酉盛度程琳罷御史中丞孔道輔出鄆州壬寅以王巖
知樞密院事宋庠參知政事

康定元年春正月丙辰朔日有食之是月元昊寇延州
執鄜延環慶兩路副都總管劉平鄜延副都總管石元
孫詔陝西運使明鎬募強壯備邊二月丁亥以夏守贊
為宣徽南院使陝西馬步軍都總管經畧安撫使詔潼
關設守備壬辰夏守贊兼沿邊招討使出內藏緡錢賜
戍邊禁兵之家以知制誥韓琦安撫陝西甲午括畿內
京東西淮南陝西馬丙申詔諸路轉運使提刑訪知邊
事者以聞丁酉詔樞密院同宰臣議邊事辛丑出內藏


緡錢付陝西市糴軍儲丙午赦延州保安軍流以下罪
除寇所攻掠地今年夏和賜戍兵及戰死者家錢是日改
元去尊號寶元字許中外臣庶上封章言事丁未詔陝
西量民力蠲所科芻糧癸丑降范雍為吏部侍郎知安
州甲寅出內庫珠償民馬直三月丙辰詔大臣條陝西
攻守策癸亥命韓琦治陝西城池乙丑閱虎翼軍習戰
辛未詔延州錄戰沒軍士子孫月給糧丁丑詔中外言
闕政戊寅王黼陳執中張觀罷以晏殊宋綬知樞密院

事王貽永同知樞密院事詔按察官舉才堪將帥者庚
辰詔參知政事同議邊事辛巳降天下囚罪一等徒以
下釋之賜京師河北陝西河東諸軍緡錢蠲陝西夏稅
十之二減河東所科粟夏四月丙戌省陝西沿邊堡砦
甲午遣使籍陝西強壯軍乙未遼使來賀乾元節乙巳
增補河北強壯軍丙午廊延路兵馬都監黃德和坐棄
軍要斬五月壬戌張士遜致仕呂夷簡為門下侍郎同
中書門下平章事昭文館大學士癸酉詔夏守贊進屯

鄜州戊寅以夏竦為陝西馬步軍都總管兼招討使是月元昊陷塞門砦兵馬監押王繼元死之又陷安遠砦六月丁亥以夏守贊同知樞密院事甲午降三京囚罪一等徒以下釋之壬寅遣使體量安撫京東西甲辰增置陝西河北河東京東西弓手秋七月乙丑遣使以討元昊告于遼庚午閱諸軍習戰戊寅以子昕為忠正軍節度使封壽國公八月戊申夏守贊罷以杜衍同知樞密院事辛亥詔范仲淹葛懷敏領兵驅逐塞門等砦蕃

騎出境仍募弓箭手給地居之九月戊午李若谷罷以
宋綬晁宗慤參知政事鄭戩同知樞密院事戊辰以晏
殊為樞密使王貽永杜衍鄭戩並樞密副使甲戌詔使
臣諸班諸軍有武藝者自陳辛巳閱諸軍習戰是月元
昊寇三川砦都巡檢楊保吉死之又圍師子定川堡遂
陷乾溝乾河趙福三堡環慶路兵馬副都總管任福攻
白豹城破之冬十月乙未製銅木契傳信牌甲辰錄方
畧士六十一人授官有差十二月癸未出內藏庫絹助

糴軍儲丙戌詔以常平緡錢助糴軍儲癸卯宋綬卒戊申鑄當十錢權助邊費



欽定續通志卷二十八

欽定四庫全書

史部

欽定續通志卷

三十一

主事臣尹壯圖覆勘

總校官原任侍講臣王燕緒

欽定四庫全書

欽定續通志卷二十九

宋紀五

仁宗二

英宗

慶厯元年春正月己未加嘉勒斯賚河西節度使是月
元昊請和二月己亥壽國公昕薨是月元昊寇渭州環
慶路馬步軍副總管任福敗於好水川福死之夏四月
甲申以資政殿學士陳執中同陝西馬步軍都總管兼

經畧安撫沿邊招討等使知永興軍詔夏竦仍判永興
軍乙巳降陝西囚罪一等流以下釋之五月丁巳慮囚
甲子出內藏緡錢助軍費丁卯罷陝西經畧安撫沿邊
招討都監辛未宋庠鄭戢罷以王舉正參知政事任中
師任布為樞密副使詔夏竦屯軍鄜州陳執中屯軍涇
州癸酉閱試衛士六月壬辰詔陝西諸路總管司嚴邊
備毋輒入賊界秋七月元昊寇麟府州八月戊寅詔鄜
延部署以兵援之甲申河北置場市馬乙巳募民間材

勇者補神捷指揮是月元昊寇金明砦破寧遠砦砦主
王世亶兵馬監押王顯死之元昊陷豐州知州王餘慶
兵馬監押孫吉死之冬十月甲午罷都部署分四路置
使置陝西營田務己亥罷銅符木契是月修河北城池
十一月壬子置涇原路强壮弓箭手甲子朝饗景靈宮
乙丑饗太廟奉慈廟丙寅祀天地于園丘大赦改元燭
陝西來年夏稅十之二及麟府民二年租弛京東八州
鹽禁十二月丁丑司天監上崇天萬年厯戊寅詔陝西

四路總管及轉運使兼營田

二年春三月丁巳復京師權鹽法壬戌詔以京西閒田處內附蕃族無親屬者二月乙未詔河北強壯刺手背為義勇軍三月甲辰詔殿前指揮使兩省都知舉武臣才堪為將者丁巳以杜衍宣撫河東辛酉晁宗慤罷己巳遼使蕭英劉六符來致書求割地夏四月戊寅令御史中丞諫官同較三司用度罷其不急者庚辰遣知制誥富弼如契丹報使五月辛亥慮囚甲寅詔三館臣僚上

封事及請對戊午建大名府為北京降河北州軍因罪
一等杖以下釋之乙酉罷左藏庫月進錢戊辰禁銷金
為服飾是月契丹兵集幽州聲言入寇詔河北京東皆為
邊備六月甲戌出內藏銀紬絹助邊費丙申閱蕃落將
士騎射戊戌詔減省南郊臣僚賜與秋七月丙午任布
罷戊午以呂夷簡兼判樞密院事章得象兼樞密使晏
殊加平章事癸亥富弼再使于契丹九月丙午呂夷簡改
兼樞密使乙丑契丹使耶律仁起劉六符持誓書來閏月

戊戌罷河北民間科徭是月元昊寇定川砦涇原路馬步軍副都總管葛懷敏死之冬十月庚戌赦陝西保捷軍甲寅遣使安撫涇原路丙辰知制誥梁適報使于契丹戊午發定州禁軍屯涇原庚申詔恤陣亡將校其妻女無依者養之宮中丙寅契丹使來再致誓書報徹兵十一月辛巳復都部署兼招討等使命韓琦范仲淹龐籍分領之

三年春正月庚午封皇子曦為鄂王辛未曦薨丙子減

陝西歲市木三之一辛巳詔輔臣議蠲減天下賦役戊子詔錄將校死王事而無子孫者親屬癸巳元昊自名曩霄遣人來納款稱夏國三月壬申閱衛士武技戊子呂夷簡罷為司徒監修國史與議軍國大事以章得象為昭文館大學士晏殊為集賢殿大學士並兼樞密使夏竦為樞密使賈昌朝參知政事夏四月戊戌如瓊林苑閱騎士癸卯遣使封元昊為夏國主歲賜茶絹甲辰以韓琦范仲淹為樞密副使乙酉詔夏竦還本鎮以杜

行為樞密使甲子呂夷簡罷議軍國大事五月丁卯朔
日有食之庚午慮囚是月忻州虎翼卒王倫叛秋七月
辛未詔二府不限奏事常制得數陳留對丙子王舉正
罷壬午罷陝西管內營田甲申命任中師宣撫河東范
仲淹宣撫陝西乙酉王倫伏誅八月丁未以范仲淹參
知政事富弼為樞密副使癸丑以韓琦代范仲淹宣撫
陝西九月丁卯詔輔臣對天章閣戊辰呂夷簡以太尉
致仕乙亥任中師罷是月桂陽蠻寇邊湖南提刑討平

之冬十月乙卯詔修兵書甲子築水洛城是月光化軍
亂討平之十一月壬辰限職田十二月乙巳桂陽監猺
復寇邊

四年春正月乙亥荆王元儼薨二月丙辰出奉宸庫銀
振陝西饑甲寅罷陝西四路馬步軍都總管經畧安撫
招討使復置隨路都總管經畧安撫招討使三月辛未
減廣濟河歲漕軍儲乙亥詔天下州縣立學更定科舉
法甲申免衡道州桂陽監民經猺賊劫畧者賦役一歲

夏四月丁酉宜州蠻歐希範叛詔廣西轉運鈐轄司發兵討之五月庚午慮囚壬申如國子監謁孔子遂如武成王廟又至玉津園觀種稻戊寅募人納粟振淮南饑丙戌曩霄遣人來復稱臣六月壬子降天下囚罪一等以范仲淹宣撫陝西河東秋七月癸未契丹遣使者來告伐夏甲申夷人寇三江砦消井監官兵擊走之八月辛卯命賈昌朝領天下農田范仲淹領刑法事甲午以富弼宣撫河北戊戌遣右正言余靖報使于契丹保州雲翼

饗太廟奉慈廟壬午冬至祀天地於圜丘大赦十二月
乙未封曩霄為夏國主

五年春正月甲戌罷河東陝西諸路招討使丙子契丹使
來告伐夏師還庚辰遣知制誥余靖報使于契丹乙酉范
仲淹富弼罷丙戌杜衍罷以賈昌朝同中書門下平章
事兼樞密使集賢殿大學士王貽永為樞密使宋庠參
知政事吳育龐籍並為樞密副使二月壬辰曩霄初遣
人來賀正旦癸卯以久旱詔州縣毋淹繫刑獄辛亥祈

雨於相國天清寺會靈祥源觀癸丑桂陽監言唐和等
復內寇三月辛酉韓琦罷甲子宜州討蠻賊歐希範平
之甲申降陝西囚罪一等賜邊兵緡錢蠲民去年逋負及
租稅之半麟府州嘗為羌所掠者其逋負租稅如之丙
戌罷入粟補官夏四月丁亥朔日當食不見慮囚及遣
使慮三京囚辛卯曩霄初遣人來賀乾元節戊申章得
象罷以賈昌朝為昭文館大學士陳執中同中書門下
平章事集賢殿大學士兼樞密使庚戌以吳育參知政

事丁度為樞密副使六月丁卯減益梓州上供絹歲三之一及紅錦鹿胎之半冬十月乙卯契丹使者來辛酉大赦辛未頒歷於夏國庚辰罷宰臣兼樞密使

六年春正月戊申徙廣南戍兵善地以避瘴毒二月戊寅詔陝西經畧安撫及轉運司議裁節諸費及所置官員無用者以聞三月辛巳朔日有食之慮囚五月丙戌慮囚戊子減邛州鹽井歲課緡錢丙申詔陝西市蕃部馬丁酉京東人劉沓劉沔胡信謀反伏誅秋八月癸酉

以吳育為樞密副使丁度參知政事冬十月辛未詔發
兵討湖南徭十一月己卯遣官議夏國封界癸未湖南
徭寇英韶州辛丑畋于東韓村免乘輿所過及園內田
租一歲

七年春正月丁亥詔河北所括馬死者限二年償之壬
寅詔減連州民被徭害者來年夏租三月壬午慮囚癸
未詔天下有能言寬恤民力之事者有司驛置以聞毀
後苑龍船丁亥以旱罷大宴癸巳避正殿減常膳詔中

外臣僚上封事乙未賈昌朝罷以陳執中為昭文館大學士夏竦同中書門下平章事集賢殿大學士吳育為給事中歸班文彥博為樞密副使罷出獵丁酉以夏竦為樞密使文彥博參知政事高若訥為樞密副使辛丑祈雨於西太一宮壬寅陳執中宋庠丁度以旱降官一等夏四月丁未謝雨乙卯復執中庠度官五月己亥命翰林學士楊察蠲放天下逋負辛丑詔西北二邊有大事二府與兩制以上雜議之六月乙巳詔禁畜猛獸害

人者辛酉詔天下知縣非鞠獄毋得差遣秋七月甲申
降南京畿內囚罪一等徒以下釋之賜民夏租之半除
災傷倚閭稅及欠折官物非侵盜者辛丑禁貢餘物饋
近臣八月乙丑析河北為四路各置都總管冬十月壬
子李迪薨十一月丙申朝饗景靈宮丁酉饗太廟奉慈
廟戊戌祀天地於圜丘大赦貝州宣毅卒王則據城反
十二月庚戌命樞密直學士明鎬體量安撫河北
八年春正月丁丑以文彥博宣撫河北明鎬副之閏月

辛丑貝州平甲辰曲赦河北免民田為兵所踐者租改
貝州為恩州戊申以文彥博同中書門下平章事集賢
殿大學士辛酉親從官顏秀等四人夜入禁中謀為變
捕殺之丙寅磔王則於都市丁卯知貝州張得一坐降
賊伏誅二月夏國來告曩霄卒己卯賜瀛莫恩冀州緡
錢贖還饑民所鬻子三月辛亥遣使體量安撫陝西壬
戌以霖雨慮囚夏四月己巳封曩霄子諒祚為夏國主
壬申丁度罷以明錫參知政事五月辛酉夏竦罷以宋

庠為樞密使龐籍參知政事六月戊辰詔近臣舉文武
官材堪將帥者丙子河決澶州商胡埽甲午明鎬卒丙
申章得象薨秋七月戊戌以河北水令州縣募饑民為
軍九月戊午詔以今年江淮漕米給河北州軍冬十一
月壬戌出廩米減價濟畿內貧民十二月乙丑以霖雨
頌德音改明年元減天下囚罪一等徒以下釋之出內
藏錢帛買粟以濟河北流民丁卯冊美人張氏為貴妃
戊子遣使體量安撫利州路

皇祐元年春正月甲戌朔日有食之以河北水災罷上
元張燈停作樂庚戌張士遜薨己未以緡錢市穀種分
給河北貧民辛酉詔臺諫非朝廷得失民間利病毋風
聞彈奏二月戊辰以河北疫遣使頒藥辛未發禁軍十
指揮赴京東西路備盜三月丁巳慮囚已未契丹使來告
伐夏庚申翰林院學士錢明逸報使于契丹夏四月癸未
梓州轉運司言清井監夷人平六月甲子蠲河北復業
民租賦二年秋八月壬戌陳執中罷以文彥博為昭文

館大學士宋庠同中書門下平章事集賢殿大學士龐
籍為樞密使高若訥參知政事梁適為樞密副使九月
乙巳廣源州蠻儂智高寇邕州詔江南福建等路發兵
以備冬十一月丙申詔河北被災民八十以上及篤疾
不能自存者人賜酒米辛丑詔民有冤貧不能詣闕者
聽訴於監司以聞十二月甲子遣入內供奉高懷政督
捕邕州盜賊

二年春正月癸卯以歲饑罷上元觀燈壬子命近臣同

三司較天下財賦出入之數二月甲申出內庫絹付河北陝西河東路以備軍賞三月戊子朔詔季秋有事於明堂己丑以大慶殿為明堂戊戌詔明堂禮成羣臣毋上尊號庚子遼遣使以伐夏師還來告遣翰林學士趙槩報使于遼夏五月丁亥朔作明堂禮神玉己亥旌定州義民李能六月丁卯以自製黃鍾五音五曲並肄於太常庚午定選舉縣令法癸未慮囚癸亥出內藏絹羅軍儲九月丁亥閱雅樂己酉朝饗景靈宮庚戌饗太廟

辛亥大饗天地於明堂以太祖太宗真宗配如圜丘大赦百官進秩一等冬十月乙亥宴京畿父老於錫慶院閏十一月丁卯詔中書門下省兩制及太常官詳定大樂以河北水詔蠲民租出內藏錢絹付本路使措置是歲芻糧十二月甲申定三品以上家廟制涇原路生戶都首領那龍男阿日丁內附

三年春二月丙戌宰臣文彥博等進皇祐大饗明堂記己亥復行河北沿邊州軍入中糧草見錢法三月庚申

宋庠罷以劉沆參知政事癸酉儂智高表獻馴象及金銀卻之夏五月庚戌以恩冀州早詔長吏決繫囚壬申置河渠司丁丑慮囚六月丁亥無為軍獻芝草帝命姑免知軍茹孝標罪戒州郡自今勿復獻秋七月丙辰以孔氏子孫復知仙源縣事丙子減郴永州桂陽監丁身米八月丙戌遣使安撫京東淮南兩浙荆湖江南饑民冬十月庚子文彥博罷以龐籍同中書門下平章事昭文館大學士高若訥為樞密使梁適參知政事王堯臣

為樞密副使十一月辛亥減漳州泉州興化軍丁米十
二月庚辰新作渾儀

四年春正月己巳詔諸路貸民種乙亥塞大名府決河
二月庚子蠲湖州民所貸官米三月丙辰蠲江南路所
貸種粟辛酉慮囚夏四月廣源州蠻儂智高反五月乙
巳智高陷邕州遂陷橫貴等八州圍廣州壬申命知桂
州陳曙率兵討之六月乙亥起前衛尉卿余靖為秘書
監湖南安撫使知潭州前屯田員外郎直史館楊敞體

量安撫廣南提舉經制盜賊事庚辰改余靖為廣西安撫使知桂州命同提點廣東刑獄李樞與陳曙討智高廣東轉運鈐轄司發兵援之丁亥以狄青為樞密副使秋七月乙巳出內藏錢絹助河北軍儲丙午命余靖經制廣南盜賊事壬戌智高引衆去廣州廣東兵馬鈐轄張忠知英州蘇緘邀戰於白田忠死之甲子廣東兵馬鈐轄蔣偕又敗於路田八月辛卯命樞密直學士孫洙安撫湖南江西內侍押班石全斌副之九月丁巳命余

靖提舉廣南兵甲經制賊盜事庚申廣西兵馬鈐轄王
正倫及智高戰於昭州館門驛死之智高入昭州庚午
以狄青為宣徽南院使宣撫荆湖路提舉廣南經制賊
盜事是月智高襲殺蔣偕於太平場冬十月丙子詔發
鄜延環慶涇原路擇蕃落廣銳軍赴廣南行營丁丑智
高入賓州甲申復入邕州十一月壬寅朔日有食之戊
午詔免江西湖南廣南民供軍須者今年秋租十之三
五年春正月戊午狄青敗智高於邕州智高遁甲子遣

使撫問廣南將校賜軍士緡錢二月癸未狄青復為樞密副使甲申赦廣南凡戰沒者給槨櫬護送還家無主者葬祭之賊所過郡縣免田租一年死事家科徭二年貢舉人免解至禮部不預奏名者亦以名聞丙戌詔廣西都監蕭注等追捕智高丁亥減江西湖南囚罪一等徒以下釋之丁壯饋運廣南者減夏稅之半仍免差徭一年夏四月甲午命劉沆梁適監議大樂五月乙巳詔輔臣凡有大政許復對後殿高若訥罷以狄青為樞密

使丁未孫沔為樞密副使戊申詔轉運使毋取羨餘以
助三司庚戌詔智高所至州無城壘若兵力不敵而棄
城者奏裁壬子慮囚丁巳振邕州貧民米六月乙亥御
紫宸殿按太安樂觀祭器丙戌作集禧觀成乙未詔河
北荐饑轉運使察州縣長吏能招輯勞來者上其狀不
稱職者舉劾之秋七月乙巳免荆湖北路民因災傷所
貸常平倉米閏月戊辰詔廣南民逃未還者限一年歸
業仍復三歲壬申龐籍罷以陳執中同中書門下平章

事昭文館大學士梁適同中書門下平章事集賢殿大學士乙亥詔武臣知州軍須與僚屬參議公事毋專決庚辰秦鳳路言總管劉煥等破蕃部八月丁酉詔民訴災傷而監司不受者聽州軍以狀聞冬十月丙申朔日有食之十一月丁卯朝饗景靈宮戊辰饗太廟奉慈廟己巳祀天地於圜丘大赦戊子放天下逋負十二月戊午詔轉運官毋得進羨餘

至和元年春正月癸酉貴妃張氏薨輟視朝七日禁京

城樂一月丁丑追冊為皇后賜諡溫成辛卯慮囚減三
京輔郡雜犯死罪一等徒以下釋之二月壬戌孫沔罷
以田況為樞密副使三月己巳王貽永罷以王德用為
樞密使乙亥大史言日當食四月朔庚辰下德音改元
減死罪一等流以下釋之癸未易服避正殿減常膳乙
酉勸富人納粟振京西饑民夏四月庚午朔日有食之
五月戊寅以河北流民稍復遣使安撫秋七月丁卯以
程戡參知政事立溫成園戊辰梁適罷己巳出御史馬

遵呂景初吳中復八月丙午以劉沆同中書門下平章
事集賢殿大學士九月乙亥契丹使來告與夏平辛巳遣
三司使王拱辰報使于契丹冬十月丙午溫成皇后神主
入廟戊午如城北砲塲觀發砲十一月甲子出太廟禘
祫時饗及溫成皇后樂章肆於太常十二月癸丑詔內
侍傳宣令都知司劄報被旨者覆奏是歲融州大邱洞
楊光朝內附

二年春正月丁卯減畿內輔郡囚罪一等徒以下釋之

戊辰邕州言蘇茂州蠻入寇詔廣西發兵討之丁亥晏
殊薨二月壬辰汾州圍練推官郭固上車戰法三月丙
子封孔子後為衍聖公是月以旱除畿內民逋芻及去
秋逋稅罷營繕諸役夏四月己亥契丹使來賀乾元節并
求御容五月己未慮囚六月戊戌陳執中罷以文彥博
同中書門下平章事昭文館大學士劉沆監修國史富
弼同中書門下平章事集賢殿大學士乙巳儂智高母
儂氏弟智光子繼宗繼封伏誅秋八月戊子減畿內輔

郡囚罪一等徒以下釋之乙未置臺諫章奏簿九月戊午契丹使來告其國主宗真殂帝為發哀成服於內東門幕次遣使祭奠弔慰及賀其子洪基嗣位冬十月癸丑下溪州蠻彭仕義入寇詔湖北路發兵捕之十一月乙卯交趾來告李德政卒己未行並邊見錢和糴法十二月丁亥修六塔河庚子契丹使來致其先帝遺物及謝弔祭是歲西界阿克等內附詔遣還龍賜州彭師黨以其族來歸

嘉祐元年春正月甲子大赦蠲被災田租及倚閣稅三月癸酉契丹遣使者來閏月癸未以王堯臣參知政事程戡為樞密副使夏四月壬子朔六塔河復決甲戌慮囚六月辛未免畿內京東西河北被水民田租戊寅遣使安撫河北己卯詔羣臣實封言時政闕失秋七月乙酉命京東西湖北監司分行水災州軍振饑蠲租丙戌賜河北流民水壓溺死者賜其家錢有差己丑出內藏銀絹振貸河北乙巳貸被水災民麥種是月環州小遇族

叛知州張揆討平之八月庚戌朔日有食之癸亥狄青
罷以韓琦為樞密使乙亥減京城囚罪戊寅詔湖北招
安彭仕義九月辛卯大赦改元十一月辛巳王德用罷
賈昌朝為樞密使十二月壬子劉沆罷以曾公亮參知
政事是歲融桂州蠻楊克端等內附

二年春二月己酉梓夔路三里村夷人寇涪井監庚戌
慮囚降死罪以下遣使錄三京輔郡繫囚壬戌杜衍薨
澧州羅城洞蠻入寇州兵擊走之癸酉王德用卒三月

戊寅振河北被災民乙未契丹使來求御容戊戌遣張昇
報使于契丹癸卯狄青卒是月賜禮部奏名進士諸科及
第出身八百七十七人親試舉人免黜落始此夏四月
丁未遣使安撫河北峒蠻懷宗旦入寇癸酉遣使安撫
湖北五月庚辰管勾麟府軍馬公事郭恩為夏人所襲
死之六月戊午夏國主諒祚遣人來謝弔祭秋七月辛
巳詔河北諸道總管分遣兵官教閱所部軍丁酉詔陝
西河北諸路經畧安撫舉文武官材堪將領者各一人

八月庚申慮囚降死罪以下九月庚子契丹再遣使者來

求御容冬十月乙巳遣胡宿報使于契丹

東都事畧作張昇奉御容使于契丹

丙午班祿令

三年春正月戊戌鑿永通河二月癸卯契丹使來告其祖

母哀遣使祭奠弔慰癸丑慮囚降死罪以下夏四月甲

子吳育卒五月甲午契丹使來致其祖母遺物六月丙午

文彥博賈昌朝罷以富弼為昭文館大學士韓琦同中

書門下平章事集賢殿大學士宋庠田況為樞密使張

昇為樞密副使秋七月丙子遣使行視原武縣民田振
恤被水害者癸巳以夔州路旱遣使安撫八月己亥朔
日有食之己未王堯臣卒庚申彭仕義降九月癸酉議
罷榷茶法己丑契丹使來謝冬十月癸亥除河北坊郭客
戶乾食鹽錢十一月癸酉議減冗費己丑置都水監罷
三司河渠司十二月己巳詔三司歲上天下稅賦之數
三歲一會虧贏以聞閏月丁丑詔裁定制科及進士高
第人恩數庚辰詔明年正旦日食其自丁亥避正殿減

常膳宴契丹使母作樂壬午慮囚降三京死罪以下

四年春正月丙申朔日有食之二月己巳罷榷茶庚午
廣南言交趾寇欽州三月戊戌命近臣同三司減定民
間科率夏四月癸酉封柴氏後為崇義公給田千頃奉
周室祀癸未陳執中薨壬辰慮囚降死罪以下五月壬
子遣官經界河北牧地餘募民種藝六月丁丑詔轉運
司凡隣州饑而閉糴者以違制論辛卯放宮女二百十
四人秋七月丁未放宮女二百三十六人冬十月壬申

朝饗景靈宮癸酉大禘於太廟大赦十一月庚子汝南郡王允讓薨

五年春二月壬戌慮囚三月癸巳劉沆薨夏四月癸未程戡罷以孫抃為樞密副使丙戌命近臣同三司議均稅五月己酉以王安石為三司度支判官丁巳慮囚降死罪六月乙亥遣官分行天下訪寬恤民力事秋七月癸巳邕州言交趾與甲峒蠻合兵寇邊都巡檢宋士堯拒戰死之詔發諸州兵討捕戊戌翰林學士歐陽修上

新修唐書八月壬申詔求逸書庚辰置陝西估馬司冬十一月辛卯罷內臣寄遷法辛丑宋庠罷以曾公亮為樞密使張昇孫抃為參知政事歐陽修陳升之趙槩為樞密副使十二月己卯蘇茂州蠻寇邕州

六年春二月丙寅慮囚降死罪以下三月己亥富弼以母喪去位戊申給西京周廟祭享器服夏四月庚辰陳升之罷以包拯為樞密副使出諫官唐介趙抃御史范師道呂誨五月庚戌慮囚降死罪以下遣使錄三京繫

四六月壬子朔日有食之丙子以司馬光知諫院入對
戊寅以王安石知制誥秋七月丙戌遣使行視淮南江
浙水災量蠲其稅戊子錄昭憲皇太后孝明孝惠孝章
淑德皇后家子孫閏八月庚子以韓琦為昭文館大學
士曾公亮同中書門下平章事集賢殿大學士張昇為
樞密使辛丑以胡宿為樞密副使冬十月壬辰起復前
右衛大將軍岳州團練使宗實為秦州防禦使知宗正
寺辭不拜十一月己巳許夏國用漢衣冠十二月丙戌

復豐州

七年春正月辛未復命宗實為秦州防禦使知宗正寺
乙亥詔南郊以太祖配為定制改溫成皇后廟為祠殿
二月己卯朔更江西鹽法癸酉慮囚命官錄被水諸州
繫囚三月乙卯孫抃罷以趙槩參知政事吳奎為樞密
副使五月庚午包拯卒秋八月己卯詔以宗實為皇子
癸未賜名曙庚子以立皇子告天地宗廟諸陵九月乙
己朔以皇子為齊州防禦使進封鉅鹿郡公己酉朝饗

景靈宮庚戌饗太廟辛亥大饗明堂奉真宗配大赦冬
十月乙亥皇子表辭所除官不允丙申詔內藏庫三司
出緡錢助糴天下常平倉

八年春二月癸未帝不豫甲申下德音降天下囚罪一
等徒以下釋之丙戌中書樞密奏事於福寧殿之西閣
三月戊申龐籍薨辛未皇帝崩於福寧殿年五十四遺
制皇子即皇帝位皇后為皇太后諡曰神文聖武明孝
皇帝廟號仁宗陵曰永昭陵

仁宗天聖九年明道二年景祐四年寶元二年康
定一年慶厯八年皇祐五年至和二年嘉祐八年
凡四十一年

英宗皇帝諱曙濮安懿王允讓第十三子也生四歲仁
宗取入宮養之寶元二年皇子生帝乃歸濮邸景祐三
年賜名宗實授左監門衛率府副率累遷右羽林軍大
將軍宜州刺史皇祐二年

東都事畧
作元年

為右衛大將軍岳

州團練使仁宗春秋高皇子不育中外共以為憂大臣

文彥博韓琦等屢請建儲仁宗曰宗子已有可付者卿等其勿憂時帝方居濮王憂嘉祐六年十月起為秦州防禦使知宗正寺帝以未終喪固辭不受七年八月復為岳州團練使旋立為皇子改今名帝力辭不獲已乃入見于清居殿帝始召戒其舍人曰謹守吾舍上有適嗣即歸矣自是日再朝或入侍禁中遷齊州防禦使鉅鹿郡公八年三月辛未仁宗崩夏四月壬申朔皇后傳遺詔命帝即皇帝位于柩前帝御東楹見百官癸酉

大赦文武官進爵一等遣王道恭告哀于契丹帝欲亮陰
三年以韓琦攝冢宰琦不可乃止乙亥帝不豫遣韓贄
等告即位于契丹丙子尊皇后曰皇太后壬午皇太后御
小殿垂簾同聽政宰臣覆奏事丁亥以子右千牛衛將
軍仲鍼為安州觀察使光國公庚子立京兆郡君高氏
為皇后五月戊午以富弼為樞密使戊辰初御延和殿
以疾未平命宰臣祈福于天地宗廟社稷六月辛卯契丹
使來祭弔秋九月辛亥以光國公仲鍼為忠武軍節度

使同中書門下平章事淮陽郡王改名頊冬十月甲午
葬仁宗皇帝于永昭陵十一月己酉減東西京囚罪一
等免山陵役戶及靈駕所過民租辛亥契丹使來賀即位
治平元年春正月丁酉朔改元三月戊午慮囚夏四月
癸未放宮女百三十五人五月戊申皇太后還政壬子
詔皇太后稱聖旨出入儀衛如章獻太后故事閏月戊
辰輔臣進爵一等六月己亥以淮陽王頊為潁王祈國
公頊為保寧軍節度使同中書門下平章事東陽郡王

鄆國公願為左衛上將軍秋八月甲辰錄周世宗後乙卯遣兵部員外郎呂誨等充賀契丹太后生辰正旦使刑部郎中章岷等充賀契丹主生辰正旦使丙辰貶內侍都知任守忠為保信軍節度副使蘄州安置丁巳以上供米振宿亳二州九月庚午詔夏國精擇使人戒勵毋紊彝章冬十一月乙亥科陝西戶三丁之一刺以為義勇軍戊寅復內侍養子令十二月丙辰契丹使來賀壽聖節及明年正旦吳奎罷以王疇為樞密副使是歲西蕃嘉

沁子嘉且密整內附

二年春正月甲戌振蔡州饑二月癸卯王疇罷丁未慮
囚三月己巳班明天厯夏四月戊戌詔議崇奉濮安懿
王典禮六月壬辰慮囚己酉詔尚書集三省御史臺議
奉濮安懿王典禮甲寅罷尚書省集議令有司博求典
故務在合經遣使與契丹定疆界秋七月癸亥富弼罷丙
寅詔減乘輿服御丙子放宮女一百八十人庚辰張昇
罷以文彥博為樞密使八月乙未以雨水詔責躬乞言

壬子以工部郎中蔡抗等充賀契丹主生辰使侍御史趙鼎等充賀正旦使冬十一月庚午朝饗景靈宮辛未饗太廟壬申有事于南郊大赦辛巳加恩百官

三年春正月丙辰朔契丹使來賀正旦戊午復使來賀壽聖節丁丑皇太后下書中書門下封濮安懿王宜如前代故事王夫人王氏韓氏任氏皇帝可稱親尊濮安懿王為皇夫人為后辛巳詔臣民避濮安懿王諱以王子宗懿為濮國公壬午黜御史呂誨范純仁呂大防三月

辛酉黜諫官傅堯俞御史趙鼎趙瞻戊辰帝親慮囚庚午以彗避正殿減膳辛未以黜呂誨等詔內外癸酉以災異責躬詔轉運使察獄訟調役大利病以聞夏四月丙午詔有司察所部左道淫祀及賊殺善良不奉令者罪毋赦六月己酉慮囚秋七月乙丑進濮王子孫及魯王孫爵一等八月庚午遣傅卞等賀遼主生辰張師顏等賀正旦九月壬子朔日有食之冬十月壬午朔以仙遊縣君任氏墳域為園十一月戊午帝不豫禱于大慶

殿己未宰相始奏事辛酉降天下囚罪一等流以下釋之十二月壬寅立潁王頊為皇太子癸卯大赦賜文武官子為父後者勲一轉遼使來賀正旦及壽聖節是歲遣使以違約入寇責夏國諒祚獻方物謝罪

四年春正月庚戌朔羣臣上尊號曰體乾膺厯文武聖孝皇帝降天下囚罪一等徒以下釋之辛亥蠲京師逋餽錢丁巳皇帝崩于福寧殿年三十六諡曰憲文肅武宣孝皇帝加諡體乾膺厯隆功盛德憲文肅武睿聖宣

孝皇帝廟號英宗陵曰永厚陵

英宗治平四年

欽定續通志卷二十九

欽定四庫全書

欽定續通志卷三十

宋紀六

神宗

神宗皇帝諱頊英宗長子也母曰宣仁聖烈皇后高氏
初名仲鍼授率府副率進右千牛衛將軍嘉祐八年侍
英宗入居慶寧宮英宗即位授安州觀察使封安國公
帝隆準龍顏好學問每日晏忘食侍講王陶入侍帝率

弟顥拜之加忠武軍節度使同中書門下平章事封淮陽郡王改今名治平元年進封潁王三年十二月壬寅立為皇太子四年正月丁巳英宗崩帝即皇帝位戊午大赦及常赦所不原者遣馮行已告哀於遼己未尊皇太后曰太皇太后皇后曰皇太后以宰相韓琦為山陵使辛酉遣孫坦等告即位於遼以次行皇帝詔賜夏國主及西蕃嘉勒斯賚丙寅以吳奎為樞密副使戊辰以韓琦守司空兼侍中曾公亮行門下侍郎兼吏部尚書進

封英國公文彥博行尚書左僕射檢校司徒兼中書令
富弼為武寧軍節度使進封鄭國公檢校尚書左僕射
歐陽修趙鼎並加尚書左丞仍參知政事東平王允弼
襄陽王允良並加守太保弟東陽郡王顥進封昌王鄴
國公顥進封樂安郡王羣臣進秩有差二月乙酉立向
氏為皇后甲辰西蕃首領伊呀伯久凌結誘蕃部三百
餘帳投夏國捕斬之三月壬子昭慶軍節度檢校太傅
曹佺加檢校太尉兼侍中甲寅陝西宣撫使郭達討蕃

部党凌蒸等平之壬申歐陽修出知亳州癸酉以吳奎
參知政事乙亥允良薨閏月甲申夏國主諒祚遣使謝
罪庚子詔求直言癸卯王安石出知江寧府夏四月丙
寅慮囚吳奎出知青州遣使循行陝西河北京東京西
路體量安撫壬申奎復位罷州郡歲貢飲食果藥六月
己酉遼遣使來弔祭己未振河北流民辛未詔天下官
吏有能知徭役利病可議寬減者以聞秋八月戊午復
西夏和市癸酉葬英宗皇帝於永厚陵九月丁丑詔減

諸路逃田稅額戊子減兩京畿內鄭孟州囚罪一等民
役山陵者蠲其賦辛卯徙封顥為岐王顥為高密郡王
以富弼為尚書左僕射遣孫思恭等報謝於遼且賀生
辰及正旦壬辰錄周世宗從曾孫貽廓為三班奉職甲
午遼使來賀即位戊戌以王安石為翰林學士辛丑韓
琦罷為司徒鎮安武勝軍節度使判相州吳奎陳升之
罷樞密副使呂公弼為樞密使張方平趙抃並參知政
事邵亢為樞密副使壬寅以曾公亮為尚書左僕射文

彥博為司空癸卯以權御史中丞司馬光為翰林學士
冬十月丁未富弼罷判河陽甲寅製資治通鑑序賜司
馬光癸酉知青澗城种諤復綏州十一月戊寅詔求直
言丙戌詔二府各舉所知乙未詔内外文武官各舉有
材德行能者十二月辛酉以來歲日食正旦自己丑避
殿減膳罷朝賀己巳遼使來賀正旦

熙寧元年春正月甲戌朔日有食之改元丁丑以旱減
天下囚罪一等杖以下釋之丁亥命宰臣曾公亮等極

言闕失丙申趙鼎罷知徐州以三司使唐介參知政事
二月壬戌貸河東飢民粟三月庚辰夏主諒祚卒遣使
來告丙戌詔恤刑夏四月乙巳詔翰林學士王安石越
次入對 謹按

御製全韻詩云熙寧即位頗勵精一用安石亂機定蓋自用
安石而紛紛變法浚民以病國則神宗直是不知治道
其以為求治太速者猶覺言矣 五月甲戌募饑民補廂軍辛亥詔諸路

興水利丙寅命司馬光滕甫裁定國用秋七月以陳升
之知樞密院事給濮州雷澤縣堯陵守戶壬辰遣御史

中丞滕甫知制誥吳克安撫河北甲午減河北路囚罪
一等丁酉詔河北安撫司募民入粟八月壬寅詔京東
西路存恤河北流民乙卯詔河東及鄜延路募民入粟
實邊丁卯遣張宗益等賀遼主生辰及正旦九月辛未
進封太祖曾孫舒國公從式為安定郡王冬十月乙卯
出奉宸庫珠付河北買馬戊辰禁銷金服飾十一月丙
戌朝饗太廟丁亥祀天地於圜丘大赦羣臣進秩有差
十二月庚戌賜夏國主秉常詔許納塞門安遠二砦歸

其綏州庚申以判汝州富弼為集禧觀使詔乘驛赴闕
甲子遼使來賀正旦

二年春二月己亥以富弼同中書門下平章事庚子以
王安石參知政事乙巳以災變避正殿減膳徹樂甲子
陳升之王安石創置三司條例議行新法三月乙酉詔
漕運鹽鐵等官各具財用利害以聞戊子秉常上誓表
納塞門安遠二砦乞綏州許之乙未以旱慮囚夏四月
戊戌省内外土木工壬寅遼使來賀同天節丁未唐介

薨戊申富弼曾公亮以早上表待罪丁巳遣使察諸路
農田水利賦役甲子免河北歸業流民夏稅五月己卯
賜河北役兵特支錢癸未翰林學士鄭獬出知杭州宣
徽北院使王拱宸出判應天府知制誥錢公輔出知江
寧府甲午減西京囚罪一等六月丁巳右諫議大夫御
史中丞呂誨出知鄧州以翰林學士呂公著為御史中
丞秋七月乙丑朔日當食不見甲戌東平王允弼薨辛
巳立淮浙江湖六路均輸法壬午振恤被水州軍仍蠲

竹木稅及酒課八月癸卯貶侍御史劉琦監處州鹽酒
務御史裏行錢顥監衢州鹽稅乙巳殿中侍御史孫昌
齡貶通判蘄州丙午同修起居注范純仁罷同知諫院
戊申夏國請從舊蕃儀許之己酉以范純仁知河中府
辛酉以秘書省著作佐郎程顥王子韶並為太子中允
權監察御史裏行九月丁卯立常平給斂法戊辰出內
庫緡錢糴河北常平粟丁丑遣孫固等賀遼主生辰及
正旦壬辰以秘書省著作佐郎呂惠卿為太子中允崇

政殿說書冬十月丙申富弼罷為武寧軍節度使判亳州曾公亮陳升之並同中書門下平章事十一月乙丑以韓絳制置三司條例己丑減天下囚罪一等徒以下釋之閏月庚子濬御河壬子置交子務是月差官提舉諸路常平廣惠倉兼管勾農田水利差役事十二月戊子遼使來賀正旦

三年春正月癸丑錄唐李氏周柴氏後乙卯詔諸路散青苗錢禁抑配戊午判尚書省張方平出知陳州二月

壬申以翰林學士司馬光為樞密副使凡九辭詔收還
敕誥乙酉韓琦罷河北安撫使為大名府路安撫使三
月丙申孫覺呂公著張戢程顥李常上疏極言新法不
聽翰林學士兼知通進銀臺司范鎮罷職守本官夏四
月癸亥如金明池觀水嬉宴射瓊林苑丙寅遼使來賀
同天節丁卯給兩浙轉運司度僧牒募民入粟戊辰御
史中丞呂公著貶知潁州己卯趙抃出知杭州以韓絳
參知政事監察御史裏行程顥罷為京西路同提點刑

獄壬午貶右正言李常通判滑州監察御史裏行張戩
知公安縣王子韶知上元縣癸未侍御史知雜事陳襄
罷為同修起居注程顥簽書鎮寧軍節度判官公事前
秀州軍事判官李定為太子中允監察御史裏行五月
癸巳詔並邊州郡毋給青苗錢甲辰詔罷制置三司條
例歸中書六月丙戌知諫院胡宗愈貶通判真州秋七
月辛卯歐陽修徙知蔡州壬辰呂公弼罷樞密使以知
太原府馮京為樞密副使置潞州交子務八月丙寅以

早慮囚降死罪以下振衛州饑仍蠲其租戊寅遣張景
憲等賀遼主生辰及正旦己卯夏人犯太順城環慶路
鈐轄李信慶州東路都巡檢劉甫監押种詠出戰敗績
是月慶州巡檢姚兕敗夏人於荔原堡鈐轄郭慶都監
高敏死之九月乙未韓絳罷為陝西宣撫使庚子曾公
亮罷為司空兼侍中河陽三城節度使辛丑以馮京參
知政事翰林學士吳克為樞密副使司馬光罷知永興
軍冬十月辛酉詔延州毋納夏使丙子知慶州李復圭

貶保靜軍節度副使戊寅陳升之以母憂去位乙酉詔
罷諸場務內侍監當十一月戊子振河北饑民徙京西
者壬辰蠲陝西蕃部貸糧甲辰夏人寇大順城都監燕
達等擊走之乙卯以韓絳兼河東宣撫使十二月己未
詔立諸路更戍法乙丑立保甲法丁卯以韓絳王安石
並同中書門下平章事王珪參知政事庚午夏人寇鎮
戎軍三川砦巡檢趙普伏兵擊敗之戊寅初行免役法
庚辰命王安石提舉編修三司令式壬午遼使來賀正旦

四年春正月己丑种諤襲夏兵于羅烏北大敗之壬辰王安石請鬻天下廣惠倉田為三路及京東常平倉本從之乙未渝州夷李光吉叛巡檢李宗閔等戰死命夔州路轉運使孫構討平之乙巳停括牧地庚戌罷永興軍買鹽鈔場二月丁巳罷詩賦及明經諸科以經義論策試進士辛酉詔治吏沮青苗法者戊辰詔振河北民乏食者壬申進封高密郡王顥為嘉王三月丁亥夏人陷撫寧堡戊子慶州廣銳卒叛尋討之辛卯遣使察奉

行新法不職者癸卯減河東陝西路囚罪一等徒以下
釋之民緣軍事科役者蠲其租丙午种諤責授汝州團
練使潭州安置丁未韓絳以本官知鄧州辛亥錄唐李
氏後夏四月丙辰慮囚辛酉遼使來賀同天節癸亥罷
陝西交子法癸酉司馬光權判西京留臺种諤再貶賀
州別駕壬子遣使振恩冀等州仍蠲其稅六月甲子歐
陽修以太子少師致仕丙寅慮囚甲戌富弼坐格青苗
法徙判汝州秋七月甲午振兩浙水災丁酉監察御史

裏行劉摯罷監衡州鹽倉御史中丞楊曾貶知鄭州八
月癸丑遣使體量陝西差役新法及民間利害癸酉遣
楚建中等賀遼主生辰及正旦置洮河安撫司命王韶
主之九月辛卯大饗明堂以英宗配大赦百官進秩有
差冬十月壬子罷差役法十一月甲申詔蠲逋租丁亥
作中太一宮壬寅開洪澤河達於淮十二月己未安定
郡王從式薨甲子封越國公世清為會稽郡王丙寅省
諸路廂軍丙子遼使來賀正旦

五年春正月己丑置京城邏卒察謗議時政者二月以
兩浙水賜穀振之仍募民興水利壬戌詔罷陝西遞運
銅錫丙寅以知鄭州呂公弼為宣徽南院使判秦州龍
圖閣直學士蔡挺為樞密副使三月甲午李日尊卒子
乾德嗣遣使弔贈戊戌富弼以司空致仕進封韓國公
丙午以內藏庫錢置市易務夏四月乙卯遼使來賀同
天節己未括閑田置弓箭手五月行保馬法六月壬子
曾公亮以太傅致仕秋七月壬寅初以文臣兼樞密都

承旨閏月庚戌遣中書檢正官章惇察訪荆湖北路八月秦鳳路沿邊安撫王韶復武勝軍癸巳遣崔台符等賀遼主生辰及正旦甲辰王韶破穆蒸於鞏令城碩方田均税法冬十月戊戌置熙河路減秦鳳囚罪一等十一月癸丑河州首領轄藥等來降壬申分陝西為永興秦鳳路仍置六路經畧司十二月壬午以陳升之為樞密使巳亥遼使來賀正旦

六年春二月辛卯夏人寇秦州都巡檢使劉惟吉敗之

王韶復河州壬寅以韓絳知大名府三月丙辰以四月朔日當食自丁巳避殿減膳降天下囚罪一等流以下釋之

謹按通鑑輯覽

御批日食推測可知然自屬天變敬謹修政可也避殿減膳乃至一月得毋沽名過甚至以陰雲不見為德所感而君臣相賀益夏四月甲戌朔日食不見丁丑遼使來賀同天可鄙矣

節甲午定齊徐等州保甲秋七月乙巳詔京西淮南兩浙江西荆湖等六路各置鑄錢監甲寅慮囚降死罪以下丁巳詔沿邊吏殺熟戶以邀賞者戮之八月壬申朔

遣賈昌衡等賀遼主生辰及正旦甲申罷簡州歲貢綿
紬戊戌復比閭族黨之法九月壬寅置兩浙和糴倉立
斂散法戊申詔興水利戊午岷州首領穆爾琳沁以其城
降王韶入岷州冬十月辛未章惇平懿洽州蠻辛巳以
復熙河洮岷疊宕等州御紫宸殿受羣臣賀甲申朝獻
景靈宮丙戌振兩浙江淮饑壬辰行折二錢丁酉遣使
瘞熙河戰骨十一月癸丑中太一宮成減天下囚罪一
等流以下釋之乙卯親祀太一宮十二月戊子詔決開

封府囚丙申遼使來賀正旦

七年春正月辛亥賞復岷洮等州功西京左藏庫使桑
湜等遷官有差乙卯封子俊為永國公甲子熊本平瀘
州夷二月振河陽饑癸未詔三司歲會天下財用出入
之數乙未知河州景思立等與青伊濟果莊戰於踏白
城敗績死之三月壬寅穆蒸果莊寇岷州高遵裕擊走
之慮囚減死罪一等杖以下釋之癸卯以旱避殿減膳
丙午遣使分行諸路募武士赴熙河罷兩浙增額預置

紬絹丙辰遼遣林牙蕭禧來言河東疆界命太常少卿
劉忱議之己未行方田法甲子遣使報聘於遼乙丑詔
以災異求直言夏四月癸酉以旱罷方田遼使來賀同
天節乙亥王韶破西蕃於結河川己卯以高遵裕為岷
州團練使乙酉王韶進築科諾城與蕃兵戰連破之穆
蒸降丙戌王安石罷知江寧府以韓絳同中書門下平
章事監修國史翰林學士呂惠卿參知政事丁酉詔王
韶發穆蒸及其家赴闕遼遣樞密副使蕭素議疆界於

代州境上五月戊戌減熙河路囚罪一等流以下釋之
辛丑詔河州瘞蕃部暴骸秋七月癸亥詔河北兩路捕
蝗又詔開封淮南提點提舉司檢覆蝗旱振河北西路
災八月丁丑賜環慶安撫司度僧牒以募粟振漢蕃饑
民遣張翥等賀遼主生辰及正旦辛卯詔免淮南開封
府來年春夫除放邢洺等州秋稅九月癸丑置京畿河
北京東西路三十七將甲寅詔樞密院議邊防冬十月
壬申詔韓琦富弼文彥博曾公亮條代北事宜以聞戊

寅詔浙西路提舉司出米振常潤州饑庚辰置三司會
計司以韓絳提舉辛巳以河北災傷減州軍文武官員
癸巳以常平米於淮南西路易饑民所掘蝗種又振河
北東路流民十一月巳未祀天地於圜丘大赦十二月
丙寅省熙河岷三州官百四十員巳丑遼使來賀正旦
是歲消井長寧夷十郡及武都夷內附

八年春正月庚子蔡挺罷判南京留司御史臺馮京罷
知亳州輟江南東路上供米均給災傷州軍戊午詔所

在流民願歸業者州縣齎遣之二月癸酉以王安石同
中書門下平章事乙酉初行河北戶馬法丙戌停京畿
土功七年三月丁酉振潤州饑戊戌知河州鮮于師中
乞置蕃學教蕃酋子弟庚子遼蕭禧再來遣韓績往河
東會議癸丑以知制誥沈括報聘復振常潤饑民夏四
月丁卯遼使來賀同天節戊寅以吳克為樞密使閏月
乙未陳升之罷為鎮江軍節度使判揚州廣源州劉紀
寇邕州歸化州儂智會敗之壬寅沈括上奉元歷癸卯

以宣徽北院使張方平判永興軍分秦鳳路兵為四將
五月辛酉慮囚降死罪一等杖以下釋之甲子分環慶
兵為四將甲申熙河路蕃官殿直頓埋謀叛伏誅己丑
遣使振鄜延環慶饑六月丙午醴汴水入蔡河以通漕
己酉頒王安石詩書周禮義於學宮辛亥以安石為尚
書左僕射兼門下侍郎戊午太師魏國公韓琦薨秋七
月戊子分涇原兵為五將命韓縝如河東割地八月庚
寅朔日當食雲陰不見癸巳募民捕蝗苗損者償之仍

復其賦丙申遣謝景溫等賀遼主生辰及正旦減官戶役錢之半詔發運司體實淮南江東兩浙米價量存州縣上供米餘減直予民庚戌韓絳罷丁巳大閱冬十月庚寅呂惠卿罷知陳州己亥詔以災異數見不御前殿減常膳求直言壬寅赦天下罷手實法十一月戊寅交趾陷欽州壬午立陝西蕃丁法甲申交趾陷廉州十二月丙申濬河壬寅以翰林學士元絳參知政事龍圖閣直學士曾孝寬簽書樞密院事辛亥以天章閣待制趙

高為安南道詔討使嘉州防禦使李憲副之以討交趾
癸丑遼使來賀正旦甲寅熙河路木宗域首領結彪謀
叛熟羌嘉卜族策巴斬其首來獻

九年春正月戊辰交趾陷邕州知州蘇緘死之己卯下
溪州刺史彭師宴及天賜州來降庚辰遣使祭南嶽南
海告以南伐二月戊子以宣徽南院使郭逵為安南道
招討使罷李憲以趙高副之詔占城占臘合擊交趾己
丑宗噶爾首領果莊寇五年谷蕃官琳沁喇勒智等擊

破之三月欽廉白州巡檢宗噶爾首領果莊冠五年谷
熙河鈐轄韓存寶敗之庚辰以种諤知岷州夏四月辛
卯遼使來賀同天節乙未以遼主母喪罷同天節上壽
戊戌復廣濟河漕丙午遣王苑臣等弔慰於遼辛亥茂
州夷寇邊遣內副押班王中正經制甲寅遼使以國母
喪來告帝發哀成服輟視朝七日五月庚辰靜州下首
領董整白等來降六月己丑綿州都監王慶崔昭用劉
珪左侍禁張乂援茂州死之己亥慮囚降死罪一等杖

以下釋之秋七月丙辰朱崖軍黎賊黃嬰入寇詔廣南西路嚴兵備之癸亥靜州將楊文緒結蕃部謀叛王中正討斬之八月戊子以文彥博守太保兼侍中行太原尹己丑遣程師孟等賀遼主生辰及正旦罷齋祠廟錢丁酉禁北邊民闌出穀粟九月戊午濬汴河丙寅詔罷都大制置河北河防水利司己卯遼遣使來謝詔恤嶺南死事家表將士墓冬十月丙午王安石罷判江寧府以吳充監修國史王珪為集賢殿大學士並同中書門

下平章事資政殿學士馮京知樞密院辛亥除沅州歸
明人戶去年倚閭秋稅十一月乙卯詔廣南東路募入
錢助軍己卯洮東安撫司言包順等破果莊兵於多移
谷壬午果莊寇岷州知州种諤等敗之十二月丙戌安
南偽觀察使劉紀降癸卯郭逵敗交趾於富良江李乾
德詣軍門降達遂班師丁未遼使來賀正旦

十年春二月甲申以崇信軍節度使宗旦同中書門下
平章事己亥以王韶知洪州丙午赦廣州囚罪一等徒

以下釋之以郭遠判潭州趙高知桂州己酉赦廣南東
路荆湖南路繫囚餘各降一等徒以下釋之三月辛未
慮囚降死罪一等杖以下釋之壬申詔州縣捕蝗夏四
月乙酉遼使來賀同天節癸巳文州蕃入寇州兵擊走
之丁酉賜熙河路兵特支錢賜戰死者帛免夏秋稅秋
八月壬寅詔潭州置將及增武臣一員遣蘇頌等賀遼
主生辰及正旦九月庚戌詔河決害民田所屬州縣疏
濬仍蠲其稅老幼疾病者振之乙卯詔諸傳宣內批面

論事無法守並從中書樞密覆奏其祈恩澤規免罪者
劾之癸酉立義倉甲戌以宗樸兼侍中封濮陽郡王冬
十月戊寅宗樸薨癸巳封昭化軍節度使宗誼為濮國
公詔濮王子以次襲封奉祀十一月甲戌祀天地於圜
丘大赦十二月壬午詔改明年元丁亥封子傭為均國
公辛丑遼使來賀正旦

元豐元年春正月乙卯以王安石為尚書左僕射舒國
公集禧觀使閏月辛巳以翰林侍讀學士呂公著兼端

明殿大學士壬辰以樞密直學士孫固同知樞密院事
己亥太傅兼侍中曾公亮薨二月庚戌濮國公宗誼薨
甲寅以邕州觀察使宗暉為淮康軍節度使封濮國公
三月辛巳慮囚降死罪一等杖以下釋之乙未御崇政
殿閱諸軍辰沅徭入寇州兵擊走之夏四月己酉遼使
來賀同天節庚申詔除九經外餘書不得出界乙丑封
虢國公宗諤為豫章郡王戊辰塞曹村決河六月癸卯
朔日有食之秋七月癸酉命西上閤門使忠州團練使

韓存寶經制瀘州納溪夷已亥詔齊州預備水災八月
癸卯西邊將尼爾完祿尊謀反伏誅丁未蠲河北被水
者租甲寅遣黃履等賀遼主生辰及正旦戊午以韓絳
為建雄軍節度使己巳詔濱棣滄三州被水民以常平
糧貸之庚午詔青齊淄三州給流民食九月乙酉以端
明殿學士呂公著樞密直學士薛向並同知樞密院事
冬十月辛亥韓存寶破瀘夷後城十有三囤十一月癸
巳辰州徭叛詔沅州兵討之己亥罷文武功臣號十二

月辛亥慮囚降死罪一等杖以下釋之丙寅遼使來賀
正旦

二年春正月乙亥罷岢嵐火山軍市馬丙子詔立高麗
交易法壬午以容州觀察使楊遂為寧遠軍節度使癸
未詔知沅州謝麟督捕猺賊二月乙卯以瀘州夷乞弟
犯邊詔王光祖等討之丙辰詔定解鹽歲額乙丑振滄
州饑三月丙戌詔雄州兩輸戶南徙者諭令復業庚寅
疏汴洛夏四月辛丑如金明池觀水嬉宴射瓊林苑甲

辰遼使來賀同天節丁巳陳升之致仕己未陳升之卒
五月丙子順州蠻叛峒兵討平之庚辰詔以濮安懿王
三夫人並稱王夫人附濮園辛巳太子太師致仕趙槩
上所集諫林甲申韓絳罷知亳州戊子御史中丞蔡確
參知政事六月甲辰廣西捕斬儂智春執其妻子以獻
秋七月甲戌張方平以太子少師致仕庚辰以淮康軍
節度使宗暉同中書門下平章事八月丙申夏人寇綏
德城都監李浦敗之辛丑分涇原路兵為十一將遣李

清臣等賀遼主生辰及正旦九月癸未降順昌軍囚罪
一等徒以下釋之冬十月戊申交趾歸所掠民詔以順
州賜之己酉太皇太后疾帝不視事庚戌罷朝謁景靈
宮命輔臣禱於天地宗廟社稷減天下囚死罪一等流
以下釋之乙卯太皇太后崩命王珪為山陵使十二月
庚申遼使來賀正旦

三年春正月丙子降潁昌府囚罪一等徒以下釋之二
月丙午以翰林學士章惇參知政事三月乙丑吳充罷

欽定四庫全書

欽定續通志
卷三十

五

戊子降兩京河陽囚罪一等役山林者蠲其賦己丑夏
四月乙未觀文殿大學士吳充薨丁酉封宗暉為濮陽
郡王己亥遼使來賀同天節戊申乞弟寇戎州兵官王
宣等戰歿五月甲申復命韓存寶經制瀘夷詔改都大
提舉瀘洛通汴司為都提舉汴河提岸司六月詔河北
河東陝西路各選文武官一員提舉義勇保甲秋七月
庚午河決澶州甲戌詔自今遇大禮罷上尊號丙戌以
星變避殿減膳詔求直言八月癸丑遣王存等賀遼主

生辰及正旦九月乙亥正官名辛巳大饗明堂大赦癸
未以薛向孫固並為樞密副使乙酉以王安石為特進
改封荊國公丙戌進封岐王顥為雍王嘉王顥曹王並
加司空文彥博為太尉封曹侁為濟陽郡王宗旦為華
陰郡王馮京為樞密使薛向罷知潁州丁亥以呂公著
為樞密副使閏九月乙卯加文彥博河東永興軍節度
使以富弼為司徒冬十一月己丑朔日當食不見十二月
甲辰遼使來賀正旦

四年春正月乙未以步軍都虞候林廣代韓存寶經制
瀘夷辛亥馮京罷知河陽以孫固知樞密院龍圖閣直
學士韓縝同知樞密院事三月癸卯章惇罷知蔡州甲
辰以翰林學士張璪參知政事乙巳命官閱九軍營陳
法於京城南戊申大閱夏四月癸亥遼使來賀同天節
己巳詔罷南郊合祭天地自今親祀北郊如南郊儀壬
申慮囚山陰縣主簿余行之謀反伏誅乙酉河決澶州
小吳埽五月丁酉詔河東路提點刑獄劉定專振被水

民秋七月庚寅夏人囚其主秉常詔陝西河東路討之
甲辰韓存寶坐逗遛伏誅八月丙辰詔蠲河北東路災
傷州軍今年夏料役錢辛酉夏人寇臨州堡詔棟戩會
兵伐之以金州刺史燕達為武康軍節度使丁丑熙河
經制李憲敗夏人於西市新城庚辰又破之於女遮谷
九月李憲復蘭州古城戊子蘭州新附首領巴令節等
攻夏人於薩卜總城敗之庚戌夏人救米脂砦鄜延經
畧副使神譔擊敗之辛亥又敗之於無定川冬十月丁

己未脂砦降庚申熙河兵及夏人戰於女遮谷敗之乙丑涇原兵及夏人戰於摩多隘敗之己巳入銀州庚午環慶行營經畧使高遵裕復通遠軍种諤及夏人戰於安定堡敗之癸酉復韋州乙亥李憲敗夏人於屈吳山丁丑曲珍與夏人戰於蒲桃山敗之戊寅种諤入貢州辛巳涇原節制王中正入宥州十一月癸未朔日有食之丁亥諸軍合攻靈州种諤敗夏人於黑水己丑李憲敗夏人於囉逋川辛卯种諤破石堡城辛丑師還十二

月辛未林廣破乞弟於納江戊寅遼使來賀正旦

五年春正月庚子貶高遵裕為郢州團練副使本州安置乙巳作新渾儀浮漏辛亥詔再議西討以熙河經制李憲為涇原熙河蘭會安撫制置使李浩權安撫副使二月癸亥華陰郡王宗旦薨丁卯封武昌軍節度觀察留後宗惠為江夏郡王癸酉降梓州路囚罪一等民緣軍事役者蠲其賦封棟戩為武威郡王三月己亥以日當食避殿減膳降天下死罪一等流以下原之壬寅廊

延路副總管曲珍敗夏人於金湯夏四月壬子朔日食
不見丁巳遼使來賀同天節癸酉官制成以王珪為尚
書左僕射兼門下侍郎蔡確為尚書右僕射兼中書侍
郎甲戌大中大夫章惇為門下侍郎張璪為中書侍郎
翰林學士蒲宗孟為尚書左丞翰林學士王安禮為尚
書右丞丁丑同知樞密院呂公著罷知定州五月辛巳
朔宋元通鑑作五月壬午朔日食然四月朔
已書日食必無五月連食之理明是誤也行官制丁
亥賞平蠻將士有差癸巳豐州卒張世矩等作亂伏誅

甲辰遣給事中徐禧治鄜延邊事六月辛亥環慶經略
司與夏人戰破之癸酉豫章郡王宗諤薨戊寅曲珍等
敗夏人於明堂川秋七月辛巳知宜州王竒與蠻戰敗
績庚子以蔡京為起居郎仍同詳定官制八月壬子進
封均國公傭為延安郡王辛未遣韓忠彥等賀遼主生
辰及正旦貶鳳州團練使种諤為文州刺史九月丁亥
夏人寇永樂曲珍與戰不利裨將寇偉等死之己丑降
京畿囚罪一等徒以下釋之戊戌夏人陷永樂給事中

徐禧內侍李舜舉陝西轉運判官李稷死之庚子安化蠻
寇宜州王竒死之冬十月甲寅貶知延州沈括為均州
團練副使隨州安置鄜延路副都總管曲珍降授皇城
使癸酉貶知太原府資政殿大學士呂惠卿知單州十
二月壬申遼使來賀正旦

六年春二月丁未夏人攻蘭州鈐轄王文郁擊走之丙
辰貶熙河經畧使李憲為經略安撫都總管以王文郁
為西上閣門使知蘭州副使李浩為四方館使三月辛

卯夏人寇蘭州丙申河東將薛義敗夏人於葭蘆西嶺
戊戌以檢校太尉王拱辰為武安軍節度使麟州將郭
忠詔等敗夏人於乜離抑部己亥河東將高永翼敗夏
人於真卿流部夏四月辛亥遼使來賀同天節甲子隴
州團練使李浩敗夏人於巴義谿五月庚寅以旱慮囚
甲午夏人寇蘭州右侍禁韋定死之又寇麟州知州訾
虎敗之閏六月乙亥夏主秉常請修貢許之戊寅詔陝
西河東毋輒出兵秋七月丙辰以四后祔廟降京畿囚

罪一等流以下原之孫固罷知河陽以同知樞密院韓
績知樞密院戶部尚書安燾同知樞密院八月乙酉遣
蔡京等賀遼主生辰及正旦辛卯蒲宗孟罷以王安禮
為尚書左丞吏部尚書李清臣為尚書右丞九月癸卯
朔日有食之冬十月癸酉秉常上表請復修職貢乞還
舊疆癸巳會稽郡王世清薨十一月丙午祀昊天上帝
於圜丘大赦甲寅文彥博以太師致仕乙卯以觀文殿
大學士韓絳為建雄軍節度使

七年春正月丙午封洺州防禦使世準為安定郡王癸丑夏人寇蘭州李憲等擊走之二月甲戌太師文彥博入覲癸未進封濮陽郡王宗暉為嗣濮王封宗晟為高密郡王宗綽建安郡王宗隱安康郡王宗瑗漢東郡王宗愈華原郡王三月辛丑賜文彥博宴於瓊林苑庚申御崇政殿大閱夏四月乙亥遼使來賀同天節癸巳夏人寇延州安塞堡將呂真敗之五月壬子慮囚降死罪一等杖以下釋之六月丙子夏人寇德順軍巡檢王友

死之辛卯江夏郡王宗惠薨秋七月甲寅王安禮罷八月辛巳遣陳睦等賀遼主生辰及正旦九月乙丑夏人圍定西城熙河將秦貴敗之冬十月乙亥夏人寇熙河戊子詔分畫交趾界以六縣二峒賜之乙未夏人寇靜邊砦涇原將彭孫敗之十一月丁酉寇清邊砦將白玉李貴死之甲辰夏國主秉常遣使來貢十二月戊辰端明殿學士司馬光上資治通鑑辛卯遼使來賀正旦是歲河東饑河北水壞洺州廬舍燬其稅

八年春正月戊戌帝不豫甲辰大赦乙巳命輔臣禱景
靈宮乙卯分遣羣臣禱於天地宗廟社稷二月癸巳帝
疾甚遷御福寧殿三月甲午朔立延安郡王傭為皇太
子賜名煦乙未大赦戊戌皇帝崩於福寧殿年三十八
謚曰英文烈武聖孝皇帝加謚體元顯道法古立憲帝
德王功英文烈武欽仁聖孝皇帝廟號神宗陵曰永裕
陵

神宗熙寧十年元豐八年凡十八年

欽定續通志卷三十